

Communicaziun a las medias

## **ISO CAMARTIN retschaiva il premi SRG.R**

Cuira, 29-01-2014 - **Iso Camartin vegn undrà cun il premi 2014 da la SRG.R, la societad purtadra da RTR Radiotelevision Svizra Rumantscha. Quai ha la suprastanza, presidiada da Oscar Knapp, decidì. Iso Camartin vegn onurà per sia lavur cumplessiva en favur da lingua, cultura e societad rumantscha.**

En sias lavurs ed incumbensas ha Iso Camartin sco autur e publicist, magister e professor, oratur e referent, secretari ed expert, schurnalist e cronist, ambassadur ed intermediatur, perscrutader e scienzià adina accentuà sia provegnientscha rumantscha, ha scrit per rumantsch e sur dal rumantsch e fatg enconuscent questa cultura en tut il mund. Questa lavur cumplessiva vul la SRG.R renconuscher. La surdada dal premi ha lieu ils 14 da zercladur 2014 a Trun, e quai en il rom da la *radunanza generala da la SRG.R*.

### **Studis e piazzas**

Iso Camartin è naschì ils 23 da mars 1944. Ensemen cun ses frar Simon crescha el si a Mustér, frequenta là las scolas dal vitg ed il gimnasi da la scola claustrala. A partir da 1965 studegia el filosofia e romanistica a Minca, Bologna e Regensburg. 1971 acquista Iso Camartin il doctorat cun ina lavur sur da Fichte e Kant a l'universidad da Regensburg. I suondan lavurs scientificas a Lyon, Regensburg ed a la Harvard University a Cambridge en ils Stadis Unids da l'America. 1978 vegn el elegì - sco successur da Hendri Spescha - secretari da la Lia Rumantscha, in post ch'el banduna 1980. Da 1985 fin 1997 è Camartin professor ordinari per litteratura rumantscha e cultura al Politecnicum federal ed a l'Universidad da Turitg.

### **Tar la Televisiun Svizra**

Da 1996 fin 1998 ha Iso Camartin moderà l'emissiun "Sternstunde Kunst" da SF DRS. Il matg 2000 cloma il directur da la la Televisiun Svizra (SF), Peter Schellenberg, Iso Camartin sco manader da la nova partiziun "cultura" a Turitg. Quai post banduna el la fin 2003 e lavura dapi lura vinavant sco publicist e referent.

**Uffizis**

Iso Camartin ha fatg e fa part a divers gremis. Il pli impurtants: cumissiun federala per la matura, president da la retscha d'ediziun CH, commember dal cussegl da fundaziun da la Pro Helvetia, commember da las giurias per il premi Büchner, premi Ingeborg Bachmann, prix J.J. Rousseau, commember da l'Uniun da scripturas e scripturs svizzers, vicepresidente da la fundaziun Landis e Gyr Zug, commember da la fundaziun Hans Ringier, commember dal cussegl scientific New Europe College Bucarest, commember dal club da schurnalists PEN.

**Retschertga, essais e belletristica, critica**

Duas ovras sajan numnadas qua, perquai ch'ellas s'audan oz tar il canon cura ch'i va per litteratura rumantscha e per linguatgs minurs en l'Europa: Rätoromanische Gegenwartsliteratur. Mustér, Casa editura Desertin, 1976, e Nichts als Worte? Ein Pladoyer fur Kleinsprachen, Artemis, 1985.

**Distincziuns**

Tgi fa curvien che Iso Camartin è adina puspè vegnì onurà per sia lavur e per sias prestaziuns! Uschia cun il premi Oertli (1984), premi europeic Charles Veillon (1986) e quel da C.F.Meyer (1988). L'onn 2005 ha il chantun Grischun undrà Iso Camartin cun il premi da cultura.

Ed uss vegn quel da la SRG.R! In premi che duai era suttastritgar las bunas relaziun dal undrà, e giubilar che festivescha il 2014 ses 70avel di da naschientscha, cun RTR Radio-televisiun Svizra Rumantscha. Dapi blers onns è el collavuratur dals programs da RTR, dal 2005 fin il 2013 p.ex. sco autur da l'emissiun "Forum" dal Radio Rumantsch, nua ch'el ha intermedià a moda maisterila ovras da la filosofia e da la musica. La SRG.R undrescha Iso Camartin per sia lavur excellenta ed extraordinaria sco autur, publicist ed intermediatur da la litteratura e cultura rumantscha e per ses engaschi per il rumantsch en Svizra, en l'Europa ed en il mund in summa.

*Per ulteriuras infurmaziuns:*

Oscar Knapp, president SRG.R

E-mail: [oscar.knapp@rtr.ch](mailto:oscar.knapp@rtr.ch)

Telefon: 079 547 64 17